

# Fungsoun orsamentu sensível ba jeneru iha Timor-Leste

Zevonia VIEIRA

Iha loran 8/8, Secretario Estado Promosaun Igualdade (SEPI) hamutuk ho Ministerio no sociedade sivil hala'o workshop kona ba orsamentu ba iha igualdade jeneru. Iha workshop ne'e reflete kona ba areas ne'ebe maka atu dezenvolve abordajen integrada ba jeneru iha kadru orsamentu. Laos ida ne'e deit mak diskute iha workshop ne'e, maibe diskute mos konaba komprende diak liu tan esperiensa no konyesi-mentu ne'ebe Timor Leste infrenta.

Secretario Estado Promosaun Igualdade, Idelta Rodrigues hato'o nia deklarasaun iha workshop ne'e katak kompromisiu ho orsamentu sensível ba jeneru klaru tiha ona iha dokumentu prinsipal Orsamentu Jeral Estado 2008. "Maske ita sedauk konsege traduz kompromisiu ne'e iha pratika sistematika ida. Maibe wainhira Governu RDTL adopta politika ida ba abordajen integrada jeneru," katak Idelta ba partisipantes workshop sira.

Idelta konfesa katak Governu rekonyese programa sira ne'ebe halao konaba igualdade no jeneru wainhira la konsidera situasaun kona ba jeneru, nesidade no interese mane no fetu nian. "Politikas no programas publikus no leis, sira sei la atinji objetivu ne'ebe ita hotu hakarak, kuandu la iha igualdade ba jeneru," hatutan nia.


Iha Timor-Leste, fetu sira reprezenta 50% husi populasaun konaba konyesementu no rekursu



**Idelta Rodrigues**  
Secretario Estado Promosaun  
Igualdade e Jeneru

iha Timor-Leste. "Progresu sosial no ekonomiku sei la bele atinji ho rekursu, enerjias no konesimentu sorin balu deit husi Timor oan sira," katak Secretari do Estado ba Promosaun Igualdade governu AMP ne'e.

Idelta hatutan liu tan katak Ohin loran ita rekonyese katak ita la bele dezenvolve politika wainhira ita la konyese mane no fetu sira nia moris. Laos ne'e deit. "Maibe wainhira ita la komprende fetu no mane sira nia komportamentu ne'ebe la hanesan, ida ne'e mos sai nu'udar problema ida," eslika Idelta.



**Lorenzo Rodrigues Pereira**  
Direitor Finansas Joventude  
no desportu

"Wainhira governu AMP dese de atu fo subsidiu ba refujiadu sira, ita tenki husu, se maka atu simu? Xefi familia maka se? Se maka responsabiliz ba jestaun osan iha familia? Se maka atu hatan iha familia kona ba osan ne'e gasta iha pratika? Tanba ne'e maka tenki konyese diak liu oinsa maka familia sira fahe rekursu. Ho nune'e maka politika sira bele alkansa ninian objetivu hodi familia sira bele hetan moris diak," tenik Idelta

Depois de workshop ho loran sorin deit ne'e ramata, jornalista Kla'ak husu Secretario do Estado

ba Promosaun Igualdade, Idelta konà ba impaktu orsamentu ne'ebe fahe ba fetu ho mane liu husi subsidiu ne'ebe governu implementa, nia hatan katak sedauk balansu. "Hau hanoin katak ita iha peritus ida ne'ebe mos halo analiza ba Orsamentu 2008 nian. Governu iha kompromisiu maibe dala ruma sedauk forte; liu-liu ba implementasaun orsamentu sensível ba jeneru iha Ministerio hotu," eslika nia. Idelta hatutan liu tan katak kuandu iha oportunidade diak sei bolu direitores planiamentu finansas hotu no politikas ministerius, Secretario estado sira atu bele fo informasaun ba sira. Tanba hau hanoin katak sira rasik mos la hatene oinsa maka atu halo planu ba orsamentu ne'ebe sensível ba jeneru. "Objetivo husi SEPI mak hakarak asegura no implementasaun politika bordajen integradu de jeneru. Maibe importante mak tenki kondus ho situasaun Timor Leste nian rasik," afirma Idelta.

Idelta hatutan katak governu iha politika atu identifika ministerio 4 hanesan ministerio boot ne'ebe bele halao serbisu ida ne'e. "Atu implementa politika ida ne'e, tanku hahu husi nivel direktor sira. Tanba direktor sira ne'e mos la iha informasaun. Diretor no fokal point sira perpara an atu bele servisu hamutuk hodi pre-

para sira nia orsamentu ba 2009," dehan nia.

Direitor finansas joventude no desportu, Lorenzo Rodrigues Pereira ba jornalista Kla'ak haktuir katak workshop kona ba orsamentu ba igualdade jeneru ne'e lori parte positiva ba sira rasik. Lorenzo eslika katak kada ministerio la bele implementa politika kona ba orsamentu ne'e. Diak liu mak SEPI halo orsamentu ba nia sekretario rasik. "SEPI la bele dehan fali programa gender nian tau fali ministerio idak-idak mak atu halo fali. Ami mos programa barak. Buat ne'e laos buat foun maibe sira haruka fali para ami tau orsamentu ba sira ne'e susar boot. Ami taug ida ne'e," afirma Lorenzo.

Lorenzo fo sujestaun ba SEPI mak diak liu SEPI buka ema diak ida hodi bele halo planu no aloka nia orsamentu ba nia edifisio rasik. "Depois maka implementa ba iha ministerio. Governu menghargai (respeita,red) ona kona ba Promosaun Igualdade. Entaun diak liu SEPI maka aloka orsamentu ne'e, dehan nia."

Iha workshop ne'e, SEPI konvida Especialista ne'ebe iha konyesementu diak ba area orsamentu sensível ba jeneru, Prof. Rhonda Sharp. Nia hanesan mos lider mundial ne'ebe agora dadauk halo hela estudu independente kona ba funsaun orsamentu sensível ba jeneru hodi hakbi'it fetu sira iha ekonomia; liu-liu iha rejiaun Azia-Pasifiku hanesan Timor-Leste no Indonesia.

Rhonda Sharp hateten katak nia iha interese boot atu estudu no halao peskiza kona ba funsaun orsamentu sensível ba jeneru iha Timor-Leste. Tanba nia haree katak situasaun Timor-Leste deferente ho rai sira seluk. Timor-Leste ne'ebe iha kultura no tradisaun ne'ebe sei forte tenki estuda didiak. "Metode saida maka bele uza iha Timor Leste," dehan Rhonda iha workshop laran.



Fetu sira iha portu Atauro, hein hela ro nakroma